



Inatsisartunut ilaasortaq Jens Immanuelson, Siumut  
Inatsisartut  
/MAANI

**Royal Greenland A/S-ip inuiaqatigiit pigisaata Upernavik Seafood A/S 50%-imik piginneqataaffigisaa Upernavik Seafood A/S-ip sinneqartoorutaanik Royal Greenland A/S qanoq pissarsiaqartarnera pillugu § 37-naapertorlugu apeqummut nr 2014-156-imut akissut.**

28-07-2014  
Suliap nr. 2014-102194  
All. nr. 1648711

Postboks 1015  
3900 Nuuk  
Oqarasuaat (+299) 34 50 00  
Allakkasuaat (+299) 32 50 02  
E-mail: govsec@nanoq.gl  
www.naalakkersuisut.gl

Inatsisartut suleriaasiani § 37 immikkoortoq 1 naapertorlugu Royal Greenland A/S-ip inuiaqatigiit pigisaata Upernavik Seafood A/S 50%-imik piginneqataaffigisaa Upernavik Seafood A/S-ip sinneqartoorutaanik Royal Greenland A/S qanoq pissarsiaqartarnera pillugu apequteqarsimavutit. Apeqqutigineqartoq uannut akisassanngortinneqar-simavoq. Akissut apeqqutigineqartut kingornatungaanniipput.

**1. Royal Greenland Namminersorlutik Oqartussanit pigineqartoq Upernavik Seafood A/S-imik piginneqataavoq ingerlatseqatigiifiup aktiaataasa 50 %-iinik. Upernavik Seafood A/S-ip sinneqartoorutaanik Royal Greenland A/S qanoq pissarsiaqartarpa?**

Akissuteqaat:

1)-imut

Royal Greenland A/S Upernavik Seafood-ip 50%-ianik piginneqataavoq. 50 %-it sinneruttut Polar Seafood-imit piginneqataassutigineqarput.

Upernavik Seafood'-ip angusai ingerlatseqatigiifiup naatsorsuutaani tamanut saqqummiunneqarsimasuni takuneqarsinnaapput, taakkulu nunatsinni tusagassiutinit nunallu tamaalaat suliassaqarfimmut tassunga tunngatillugu tusagassiorfiinit oqaaseqarfigineqartareersimapput.

Naatsorsuutini tamanut saqqummiunneqareersimasuni takuneqarsinnaavoq Upernavik Seafood 2009-mi 5.0 mio kr.-inik amigartooruteqarsimasoq. Amigartoorutit taakku ukiuni tulliuttuni sinneqartoorutinngortinneqarsimapput 2010-mi 6.6 mio kr-iullutik 2011-imilu 8.8 mio kr-iuullutik 2012-imilu 8.7 mio kr.-iullutik. 2013-imi ukiumoortumik nalunaarusiami ingerlatseqatigiiffik nalunaarpoq 5.5 mio kr-inik sinneqartoorsimalluni ilisimatitsissutigalugulu 2014-imi annikinnerusumik sinneqartooruteqarnissaq naatsorsuutigineqartoq.

Ingerlatseqatigiifiup angusaasa affai Royal Greenland A/S-ip angusaanut ilaatinneqartarput.

Royal Greenland A/S naapertorlugu Upernavik Seafood-imi angusaasartut pissutsinit marlunnit sunnerneqartarput: (a) Tunisini akigitinneqartut aamma (b) nunarsuarmi niuerfinni akigitinneqartut. Kingulliullugit taaneqartut ukiuni arlaqalersuni pitsaasumik ineriartorsimagaluarsinnarlutik, ukiuni kingullerni ajortumik ingerlalersimapput, tamatumunngalu pingaartumik pissutaalluni japanimiut aningaasaata yen-ip Euro-mut taamaasillunilu qallunaat koruunianut sanilliullugu nalikinnerulersimaneranik.

Tunisassianik tunitsivigisartakkat annersaani ilaanni pissutsit taamaanneri qalerallit eqqarsaatigalugit nunarsuarmi akigitinneqartunut tamakkiisumik sunniuteqarnerlussimavoq.

Isertitaasartut annertussusaat eqqarsaatigalugit ilanngullugit isigineqartariaqarput taavani tunitsiviusinnaasut amerlineri. Royal Greenland A/S naapertorlugu tunitsiviusartut ikilisinnerisigut imminut akilersinnaanerusumik ingerlatsisoqarsinnaavoq. Taamatulli ikilisinnerisigut inuiaqatigiinnut sunniutissat annertuujussammata taamatut ullumikkusut aaqqissuussinissaq ingerlatseqatigiiffimmit toqqarneqarsimavoq.

Assartuineri atortulersuutitigullu aningaasartuutit patsisaagunarlutik ingerlatseqatigiiffiit allat Upernavimmi nunami tunisassiorfileerusuttarsimangillat, naak tamanna oqallisigineqarlunilu allaaserineqartarsimagaluartoq.

Inussiarnersumik inuulluaqqusillunga

Finn Karlsen